



**Kalaallit Nunaannut aamma Kalaallit Nunaannit tunniussineq pillugu inatsisit pillugu siunnersuutip  
Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut  
aalajangiiffigisassaattut siunnersuut.**

(Meeqqanut, Inuusuttunut, Inatsisit Atuutinneqarnerannut Naligiisitaanermullu Naalakkersuisoq)  
(Siullermeerineq)

Inuit inatsisitigut illersugaanerannik inuianni pingaartitsisuni qitiulluinnartumut tunngassuteqarluni  
siunnersuummut Naalakkersuisunut qujanaq.

Pinerluuteqarsimagaanni nunami allami qimaaqqasoqarsinnaassanngilaq, taamaalillunilu  
iliuserisimasamut akisussaasungortinneqarani. Tassunga tunngatillugu naapertuilluartumik, ersittumik,  
nunanilu assigiinngitsuni pisussaaffitsinnut naapertuuttunik aaqqissuussaansarput pingaaruteqarpoq.

Tunniussineq pillugu ullumikkut malittarisassat nutaanngilisimallutillu paasiuminaapput. Suliap  
suliarineqarnerani nalorninermik, pisariaqanngitsumillu akimmiffinnik pilersitsisarput. Siunnersuummi  
matumani malittarisassat inatsimmi ataatsimi nutaaliaasumi, ullutsinnullu naleqquttumi  
ataatsimoortinneqassapput, tamannalu tunniussinierit pillugit sulianut pisariillisaataallunilu  
naammassiuminernerulersitsissalluni.

Naapertuilluartumik pisoqarnissaanut Kalaallit Nunaat qimaaqqaffigineqassanngimmat tamanna  
pingaaruteqarpoq. Kisianni aamma inatsiseqarnermi tunngaviumik tunngavinnut, inuillu  
pisinnaatitaaffiitut naapertuuttumik sulianik taamak ittunik inuiaqatigiittut suliaqarnissarput taamatulli  
pingaaruteqartigaaq.

Taamaattumik aamma tunniussinissamut aalajangiisinaatitaanerup maani nunami eqqartuussivinnut  
nuunneqarnera pitsaasorujussuuvoq. Inatsisitigut isumannaallisaafigineqarneq annertusissaaq, soorluttaa  
inuiaqatigiinnerput qaninnerullugu, inatsisitigullu tunngavissaqarluarnerusumik aalajangiisoqarnissaa  
qulakkiissagaa.

Ilutigisaanik nunanik avannarlernik, EU-mik, nunanillu allanik suleqateqarnermut malittarisassanik  
ersarissunik atuutsitsilernissaaq nukiuvoq. Taassuma suliaqartarneq eqaannerulersissavaa, siumullu  
nalunanginnerulersissallugu, ilutigisaanillu tunniussinissaaq inuit pisinnaatitaaffiitut imaluunnit nunat  
assigiinngitsut akornanni pisussaaffinnut akerliuppat tunniussisoqarsinnaannginneranut ersarissunik  
killissaqarneq atatiinneqassasoq.

Inatsisitigut naapertuilluartoqarneranik innuttaasut misigisimanerisa ataqqineqarnissaat Demokraatinut



aalangiisuuvoq. Pinerluuteqartoqartillugu, tamanna kinguneqassaaq. Aamma aalangiisoqartillugu, aalangiinerit paasineqarsinnaassapput.

Siunnersuut tapersorsorparput, Inatsisinullu Ataatsimiititaliami nangillugu suliarineqassasoq innersuussutigalugu.